

112 年全國語文競賽原住民族語朗讀 【拉阿魯哇語】 高中學生組 編號 1 號

kisuahlahlama sipanguhlɔvataisa hla sipanguhlɔvamai

ahlamata kiiarii akuisa hliparahlamana, usuaka sipanguhlɔvata
hla'alua, macuka sipanguhlɔvata taisaia, ihlaisakani'i araraina. macuka
utuapuhluanata sipanguhlɔvata mainiia, ihlaisa makaiu curuvaka watu'u
matiisungunai, macua usua sianguhlɔvanaia riiangu piahlama'uluvu, maisana
miiasasasara. sipanguhlɔva taisaia Avisavulangahla
miiasasasaraiana, sipanguhlɔva mainiia hlipurimacu, macua sasuaiana
tarii manganuka 'uluvuisa.

Avisavulangahla mavacangu cucu'u maiia tuhluhu miiararuma
hla'alua, kuapuaruma ahla'a hlimungahlami, hluatahlauka ahla'ani
hla'alua, hlimahlavamika ahla'a hlalitu, hluamiiisa papacin
hla'alua, saramangka Avisavulangahla, marumii mangu 'uluvuisa,
aparamamanga'a. miianguamika ahla'a, sipanguva pasasauisamika
hlalituisa, mututu muasalacu ami puaili, pacupacupangu amika ahla'a,
itaiarata mataminisuaka, hluatahlaui amiami, ruangahlami mataingalicu
ami, matahlitumahlau muckuhlɔ, hluatahlau arataicuami
maramamanga'a, mataili hlalituisa mucaucau puaruma, saramangacuka
hla'alua papapaci. angahlicuisanaka ahla'a murlu kucurungahla.

macuamika hlipurimacua takuami puavacangu isanakacucu'u,
tamutasahlupamin cucu'u, tukuhlɔamika ngatihlisaka mulungusu,

maciami muasasalaia, pasa'asisami ahla piiapiia. maruami uaniari,
maruamika ahlaina maisiparu muaumumuma, saiakakuaisanamika
ngatihlisa, arakicacumika ahlaina, saarumiiami tuku'u marituku,
sapasakulaiami luaili rukucu, marapiiahlicuami mutatasumu ngatihlisa,
papaumacuami pakutumu cucu'u, aluluanaia macukahliculavauia
saiatusuka papacika ahlaina, kuhlaisai kuavacangu cucu'u.

maruami uaniari, umarucarucakuku, musalami mahlukua
Avisavulangahla arupakari, maraiihlu mangu, tiarau pasarimii
ihlu sipanguhlɔva maini, amii Avisavulangahla, hlaa
tarisiiamanganaita pitahlukai watu'u, macu matialu watu'u kunaia,
ihlaucai mualihlu marunani, amiiamika Avisavulangahla. hlimini'ai
amiiamika hlipurimacu, marikiiamiami ivavuka
Avisavulangahla, watu'utaiisa, pasamahlangu kana'acua watu'una amiami,
sapatialaka hlipurimacu, sapitaiiiami pitahlukai, manguiau amiiamika
Avisavulangahla, pasakulai cumuhlu watu'u pusu tavuhliu, hla
pitarungahlangahla pilingilingihli, kana'acua watu'u nauu amiami
sapatialami, matilavaicuami mati'alulu maci'i, murumumu isanaka
tihla'ahlɔ cucu.

112 年全國語文競賽原住民族語朗讀 【拉阿魯哇語】高中學生組 編號 1 號

前後門神的故事

拉阿魯哇族有兩個大門，前門在高中檢查哨下的峽岩壁，名叫 ararai，後門在勤和村對面的尖石岩，名叫 curuvaka，前門有巫師 Avisavulangahla 守護，後門有巫師 hlipurimacu 看護。

Avisavulangahla 很照顧族人，有一次敵人來偷襲拉阿魯哇，Avisavulangahla 用法力使敵人意識混亂，從那時敵人就不敢再來。

hlipurimacu 喜歡捉弄百姓而不太歡迎。

hlipurimacu 去找 Avisavulangahla 說為何讓他守護後門，Avisavulangahla 說：「我們比賽接大石頭，若你接得到就換你守前門。」於是兩人開始準備。Avisavulangahla 喊石頭已經滾下去了，hlipurimacu 把石頭接住，又丟還 Avisavulangahla，Avisavulangahla 驚覺不妙，用法力把石頭燒紅，包在大石頭裡再滾下去，hlipurimacu 接到後整身貼在石頭上，焚燒而死。數十年前，人印、手印、胸印都在石頭上，目前石頭仍然存在，可惜因風化使印痕模糊不清。